

三
國
志
注
補

三國志注補卷十四

仁和趙一清譌

魏志列傳第十四

吏民負老幼東奔渠邱山

後漢書郡國志東郡東阿注魏志有渠邱山卽此傳文也

注徐眾評曰

眾乃爰字之譌

昱又遺別騎絕倉亭津

水經河水注漯水注河水於范縣東北流爲倉亭津述征記
曰倉亭津在范縣界去東阿六十里魏土地記曰津在武陽
縣東北七十里

時校事放橫

姜云校事卽明末東廠之類

曉遷汝南太守

水經淮水注新息縣外城北門內有魏汝南太守程曉碑

注曉別傳曰曉大著文章多亡失今之存者不能十分之一

何云一字宋本作二隋經籍志程曉集二卷錄一卷困學紀聞程曉女典曰麗色妖容高才美辭此乃蘭形棘心玉曜瓦質

表爲司空軍祭酒

建安三年初置軍師祭酒見武紀此無師字省文也

冀州平封嘉洧陽亭侯

水經涓水注甲庚溝水上承涓水於大穴口東北枝分東逕涓陽故城南俗謂之復陽城非也蓋涓復字類音讀變漢建安中封司空祭酒郭奉孝爲侯國

後太祖征荊州還於巴邱遇疾疫燒船

方輿紀要卷七十七巴邱山在岳州府城西南宗預使吳所謂東益巴邱之戍西增白帝之守者水經湘水注湘水至巴邱山入江山在右岸有巴陵故城是也又洞庭湖亦曰巴邱湖括地志巴邱湖中有曹公洲卽孟德爲孫權所敗燒船之處

李爲太子文學

晉書職官志王置師友文學一人

舉孝廉除廩陶長柏人令

前漢地理志鉅鹿郡廩陶趙國柏人

鉅鹿大守李邵

李邵亦見司馬郎傳蜀志楊戲輔臣贊字永南者又一李邵也

昭遷符節令

後漢書百官志符節令一人六百石

太祖表封千秋亭侯

水經穀水注千秋亭壘石爲垣世謂之城也潘岳西征賦亭有千秋之號無七旬之期謂是亭也

注獻帝春秋曰昭與列侯將議以丞相宜進爵國公九錫備物

以彰殊勲

姜云蘇則稱昭爲佞人誠然哉何云昭自顧才謀非荀郭之儔遂首爲諂邪以媚於操時操勢已成故不爲耿苞耳

注使東有掖邑之封西有菑上之虞

前漢書地理志東萊郡掖縣田單號安平君卽漢菑川國之東安平也關駟曰博陵有安平國故此加東後漢改屬北海國

文帝卽王位拜昭將作大匠

前漢書百官公卿表將作少府秦官景帝更名將作大匠一人秩二千石

明帝卽位進爵樂平侯邑千戶轉衛尉

御覽卷四百八十八引語林云董昭爲魏武重臣後失勢文帝世入爲衛尉昭乃厚加意於侏儒正朝大會侏儒作董衛尉啼面言昔太祖時事舉坐大笑明帝悵然不怡月中爲司徒

昭年八十一薨諡曰定侯

寰宇記卷十三董昭墓在曹州濟陰縣東二十里

晁爲主觀漢室漸微已爲支屬不欲擁兵

何云此時曹氏代漢之勢未成以支屬不欲擁兵乃晁後來飾詞

孫策惡之遣使卑辭厚幣以書說勳曰上續宗民

此宗民亦是賓賊卽當時山越也

劉備人傑也有度而遲得蜀日淺蜀人未附也今舉漢中蜀人震恐其勢自傾以公之神明因其傾而壓之無不克也若小緩之諸葛亮明於治而爲相關羽張飛勇冠三軍而爲將蜀民既定據險守要則不可犯矣今不取必爲後憂太祖不從

晉書宣帝紀從討張魯言於魏武曰劉備以詐力虜劉璋蜀人未附而遠爭江陵此機不可失也今若耀威漢中益州震動進兵臨之勢必瓦解因此之勢易爲功力聖人不能違時亦不失時矣魏武曰人苦無足旣得隴右復欲得蜀言竟不從與晁說同姜云策蜀是矣但晁故宗室區區炎漢惟蜀一縱而晁必欲滅之譬之禽獸其梟與獍歟又曰晁言雖是然先主非張魯之比諸葛關張蓋世人傑豈肯束手受弊耶何

三國志注卷十四
四
云劉是必死之戰得蜀雖新已能用其豪傑憑險相持非若
張魯未遇大敵小小利鈍可恐而走也雖柰何以料陳策者
料蜀士大夫乎

五年幸廣陵泗口

泗口卽泗陽詳文帝紀

蔣濟字子通楚國平阿人也

後漢書郡國志彭城郡注高帝置爲楚卽漢志之楚國也平
阿縣屬九江郡故屬沛晉改九江爲淮南宋以後因之地志
不云九江爲楚國也此云楚國平阿蓋魏時置而史失之楚
王彪傳云國除爲淮南郡是魏之楚國在漢之淮南而非彭
城也又邯鄲懷王邕傳云黃初二年封淮南公以九江郡爲

國是時稱淮南國至彪封乃改曰楚

拜濟丹陽太守

丹陽郡已屬吳而拜濟丹陽太守蓋遙奪其地也

仁欲攻濡須洲中

朱桓傳作中洲

車駕幸廣陵濟表水道難通又上三州論以諷帝

水經淮水注引蔣濟三州論曰淮湖紆遠水陸異路山陽不通陳敏穿溝更鑿白馬瀨百里渡湖三州者本詩人淮有三洲之義言水淺也

帝從之車駕卽發還到精湖水稍盡

方輿紀要卷二十三津湖在高郵州寶應縣南六十里東通

運河西北接汜光湖南入高郵州界或曰卽精湖也蔣濟鑿地聚船遏湖水灌之入淮卽此處也

時中書監令號爲專任濟上疏曰大臣太重者國危左右太親者身蔽古之至戒也

何云此疏係國安危信公才也使能用之則孫資劉放安得於彌留之際易置顧託大臣使祚移金行哉

注司馬彪戰略曰太和六年明帝遣平州刺史田豫乘海渡景初二年滅公孫淵始以遼東昌黎帶方元菟樂浪五郡爲平州後合爲幽州不應太和六年已有平州刺史且豫是時爲護烏丸校尉持節屯昌平亦不爲平州刺史也

以隨太傅司馬宣王屯洛水浮橋誅曹爽等進封都鄉侯

前漢書地理志常山郡都尉

乃以放參司空軍事歷主簿記室

後漢書百官志公府掾屬主簿錄省眾事記室令史主土章
表報書記

出爲郃陽祿祔

祿音都活反祔音詡

文帝卽位放資轉爲左右丞數月放徙爲令黃初初改祕書爲
中書以放爲監資爲令

晉職官志中書監令自此始也旣置監令又置通事郎次黃
門郎已署事過通事乃置名已署奉以入爲帝省讀書可一
清案宋書百官志祕書監一人祕書丞一人祕書郎四人漢

桓帝延熹二年置祕書監後省魏武爲魏王置祕書令丞黃
初初置中書令典尙書奏事而祕書改令爲監後欲以何禎
爲祕書丞而祕書先自有丞乃以禎爲祕書右丞後省晉志
同是又與改祕書爲中書置監令以資放爲之之說不合又
晉志云給事中漢東京省魏世復置

三年放進爵魏壽亭侯

魏壽卽漢武陵郡之漢壽縣也關公始封於此魏改曰魏壽
又以封放而蜀因改葭萌爲漢壽

注而楊豐子後爲尙方吏

後漢書百官志尙方令一人丞一人

放方丞侯

後漢書百官志涿郡方城故屬廣陽水經聖水注聖水東逕方城縣故城南李牧伐燕取方城是也魏封劉放爲侯國命更爲詔帝獨召爽與放資俱受詔命

何云疾病則辭數語中足以見放資之弄權敗國且曰獨召則并詔之真僞不可知矣晉初修史故其辭也微

注臣松之案頭責子羽曰士卿劉許字文生正之弟也與張華六人並稱文辭可觀意思詳序晉惠帝世許爲越騎校尉

世說頭責秦子羽云子曾不如太原溫永潁川荀寓范陽張華士卿劉許義陽鄒湛河南鄭詡此數子者或塞吃無宮商或佺陋希言語或淹伊多恣態或謹謹少智諳或口如含膠飴或頭如巾齏杵而猶以文采可觀意思詳序攀龍附鳳並

登天府注曰許惠帝時爲宗正卿張敏集載頭責子羽文

注案孫氏譜宏爲南陽大守宏子楚字子荆

晉書孫楚傳楚才藻卓絕爽邁不羣將軍石苞令楚作書遣
孫皓見文選

柳辛毗而助王思

何云王思在梁習傳

及咸熙中開建五等以放資著勳前朝改封正方城子宏離石
子

放子熙資子密見諸葛誕傳注引世語

宿松羅忠濟初校
黟縣黃士陵覆校

三國志注補卷十四

陽湖吳翊寅再覆校

三國志注補卷十五

仁和趙一清譔

魏志列傳第十五

太祖悅之司徒辟爲掾

一本作辟爲司徒掾非也曹公時爲司空而令三府辟之
馥旣受命單馬造合肥空城

後漢書揚州刺史治壽春建安五年移治合肥以劉馥爲刺
史後復治壽春見母邱儉諸葛誕傳

於是聚諸生立學校廣屯田興治芍陂及茹陂七門吳塘諸場
以溉稻田

方輿紀要卷二十一芍陂在南直壽州安豐城南百步亦曰

安豐塘亦曰期思陂周圍二百二十四里與陽泉大葉陂並
叔敖所作開溝引淖水爲子午渠開六門灌田萬頃建安十
四年開芍陂屯田卽此也寰宇記卷百二十七茹陂在光州
固始縣東南四十八里劉馥興築以水溉田又卷百二十六
七門堰在廬州廬江縣南百一十里劉馥修築斷龍舒水灌
田千五百頃宋劉攽七門廟記曰嘉祐二年予爲廬州從事
始以事至舒城觀所謂七門三堰者問其居人其溉田幾何
對曰凡貳萬頃攽於圖書實魏楊州刺史劉馥所造自魏迄
今七百有餘歲云予於是歎美其功後二年校書郎包君廓
爲縣主簿嘗與予語及之包君謂予曰馥信有功然吾聞於
耆老而得羹頡侯信焉初漢以龍舒之地封信爲列侯信乃

爲民畎澮舒得以廣溉浸信爲基始至馥時廢而復修耳一
清案廬江府舒城縣西北三十里有頡羹城蓋信之所封七
門三堰者堰在縣七門山下所謂烏羊堰千功堰槽牘堰也
詳方輿紀要卷二十六又寰宇記卷百二十五吳陂塘在舒
州懷甯縣西二十里有吳陂祠馥開吳陂以溉稻田呂蒙鑿
石通水注稻田三百餘頃功利及人里人以滿山廟在陂側
因指名以祀焉一清案劉元穎蓋與吳呂蒙並祠也詳蒙傳
馥子靖

何云靖字文恭見水經注十四卷中

上疏陳儒訓之本

宋書禮志靖此疏以齊王正始中上時不從之

故夫學者雖有其名而無其人

宋書禮志人作實

遂開拓邊守屯據險要又脩廣戾渠陵

當作戾陵渠水經鮑邱水注高粱水首受漯水於戾陵堰水
北有梁山山有燕刺王旦之陵故以戾陵名堰水自堰枝分
東逕梁山南山東北逕劉靖碑北其碑云魏使持節都督河
北道諸軍事征北將軍建城鄉侯沛國劉靖字文恭登梁山
以觀源流相原隰以度形勢嘉武安之通渠美秦民之殷富
乃使帳下督丁鴻軍士千人以嘉平二年立堰於水導高粱
河造戾陵遏開車箱渠其遏表云高粱河水者出自并州黃
河之別源也長岸峻固直截中流積石籠以爲主遏高一丈

東西長三十丈南北廣七十餘步依北岸立水門門廣四丈立水過長十丈山水暴發則乘過東下平流守常則自門北入灌田歲二千頃凡所封地百餘萬畝至景元三年辛酉詔書以民食轉廣陵費不贍遣謁者樊晨更制水門限田千頃刻地四千三百一十六頃出給郡縣改定田五千九百三十頃水流乘車箱渠自薊西北逕昌平東盡漁陽潞縣凡所潤合四五百里所灌田萬頃高下孔齊原隰底平疏之斯溉決之斯散導渠口以爲濤門灑澎池以爲甘澤施加於當時敷被於後世晉元康四年君少子驍騎將軍平鄉侯宏受命使持節監幽州諸軍事領護烏丸校尉監朔將軍過立積三十六載至五年夏六月洪水暴出毀損四分之三剩北岸七十

餘丈上渠車箱所在漫溢追惟前立遏之勳親臨山川指授
規略命司馬關內侯逢惲內外將士二人起長岸立石渠修
立遏治水門門廣四丈立水遏五尺興復載利通塞之宜準
遵舊制凡用功四萬有餘焉諸部王侯不召而自至襁負而
趨事者蓋數千人詩載經始勿亟易稱民忘其勞斯之謂乎
於是二府文武之士感秦國思鄭渠之績魏人置豹祀之義
乃遐慕仁政追述成功元康五年十月十一日刊石立表以
紀勳烈并記遏制度永爲後式焉

注晉陽秋曰劉宏字叔和熙之弟也

隋書經籍志晉陽秋三十二卷孫盛謨訖哀帝一清案水經
注宏字季和晉書列傳字和季未知孰審

注司馬彪序傳曰朗祖父雋字元異

晉書宣帝紀周以夏官爲司馬其後程伯休父周宣王時以世官克平徐方錫以官族因而爲氏楚漢間司馬卬爲殷王都河內漢以其地爲郡子孫遂家焉自卬八世生征西將軍鈞字叔平鈞生豫章太守量字公度量生潁川太守傳

注有子八人朗最長次卽晉宣皇帝也

晉書安平獻王孚傳孚字叔達宣帝次弟長兄朗字伯達宣帝字仲達孚弟植字季達恂字顯達進字惠達通字雅達敏字幼達俱知名故時號爲八達植魏魯相東武城侯恂魏鴻臚丞進魏中郎通魏司隸從事安城亭侯惟敏不見史傳

黎陽有營兵

方輿紀要卷十六後漢有黎陽營漢官儀云中興以幽冀并州兵平定天下故於黎陽立營兵鋒嘗爲天下冠

太祖辟爲司空掾屬除成皋令以病去復爲堂陽長

後漢書郡國志安平國堂陽故屬鉅鹿

議雖未施行然州郡領兵則本意也

何云伯達前一條所以救建武之後盡罷郡國都尉官一變西京舊制罷輕車騎士材官樓船士及軍假吏令還復民伍廢立秋講肄課試之禮馴至三十六方同日並起天下土崩也後一條則奪累世之業王莽慕古制而失其宜及亂後而復世祖懲近繆而失其會適在此時然曹氏無遠見辦制經久故口分世業反有待於拓跋之據中原也

雖在軍

軍下一本有旅字

明帝卽位封朗子遺昌武亭侯邑百戶朗弟孚

晉書孚傳孚以貞白自立高貴鄉公遭害百官莫敢奔走赴
孚枕尸於股哭之慟曰殺陛下者臣之罪奏推主者及武帝
受禪陳畱王就金墉城孚拜辭執王手流涕戲歎不能自勝
曰臣死之日固大魏之純臣也臨終遺令曰有魏貞士河內
溫縣縣司馬孚字叔達不伊不周不夷不惠立身行道終始
若一當以素棺單槨歛以時服薨時年九十三王氏應麟曰
司馬孚自謂魏貞士孚上不如晉叔矜下不如朱全昱謂之
貞士可乎

注咨字君初子鄽字子晉

何云北宋本作字仲子

注並見百官名志

志字衍隋經籍志魏晉百官名五卷

梁習字子虞陳郡人也爲郡綱紀太祖爲司空辟召爲漳長

後漢書郡國志東平國有章縣漳字誤

累轉乘氏海西下邳令

後漢書郡國志廣陵郡海西故屬東海一清案習爲海西令
爲亂民所迫逐賴徐宣以免而本傳諱之

胡狄在界張雄跋扈

何云當作雄張倉慈傳亦有大姓雄張之文

又與夏侯淵宋建

淵傳云太祖使淵率諸將討建此傳夏侯淵下有脫文

太祖從其策乃自到漢中引出諸軍令旣之武都徙氏五萬餘
落出居扶天水界

何云江統徙戎論云魏興之初與蜀分隔疆場之戎一彼一
此武帝徙武都氏於秦川欲以弱寇疆國扞禦蜀虜蓋指此
事當日操所以使劉氏無所資以北伐者不但空漢中之地
而已統徙戎之計亦卽祖旣語而反用之

注殷妻笑曰若其悖乎

若一本作君

是時武威顏俊張掖和鸞酒泉黃華西平麴演等並舉郡反

方輿紀要卷六十三六十四姑臧廢縣今涼州衛治漢爲武威郡治張掖廢縣今甘州衛治漢爲槃得縣張掖郡治焉槃音祿福祿城在肅州衛東南五十里漢縣爲酒泉郡治湟水廢縣今西寧衛治漢爲破羌縣地屬金城郡建安中置西都縣爲西平郡治

是時不置涼州自三輔拒西域皆屬雍州文帝卽王位初置涼州

晉地理志獻帝時涼州數有亂西五郡去州隔遠於是乃別以爲雍州末又依古典定九州乃合關右以爲雍州魏時復分以爲涼州刺史領戍已校尉護西域如漢故事統領八金城西平武威張掖西酒泉敦煌西海一清塞西平郡分金城

郡置西郡分張掖郡置西海郡卽故居延國並漢獻帝時立爲郡其餘皆故郡也

涼州盧水胡伊健妓妾治元多等反

水經河水注湟水又東盧谿水注之水出西南盧川方輿紀要卷六十三沮渠川在邕州衛東南或曰卽盧水也北史沮渠蒙遜世居張掖臨松盧水卽此川矣

乃潛由且次出至武威胡以爲神引還顯美

方輿紀要卷六十二六十三鷁陰城在靖虜衛西漢縣因水以爲名摺次城在莊浪衛西北漢縣摺讀胥次讀咨卽且次也

衡及鄰戴等皆降遂上疏請與儒治左城

方輿紀要卷六十四石城西百四十里有左南城河水經其南曰左南津在西寧衛東南

溫恢字曼基太原祁人也舉孝廉爲廩丘長鄆陵廣川令

後漢書郡國志濟陰郡廩丘故屬東郡潁川郡鄆陵春秋時曰隰清河國廣川故屬信都

入爲丞相主簿

據孫禮傳恢曾任刺奸主簿

賜恢子生爵關內侯生早卒爵絕

晉書溫羨傳羨字長卿漢護羌校尉序之後祖恢魏揚州刺史父恭濟南太守兄弟六人並知名於世號曰六龍穀左光祿大夫開府領司徒卒謚曰元有三子祇字敬齊太傅西曹

祿允字敬咸太子舍人裕字敬嗣尙武安長公主官至左光祿大夫

賈逵字梁道河東襄陵人也

拾遺記賈逵年五歲明惠過人其姊聞隣讀書旦夕抱逵隔籬聽之至年十歲乃暗誦六經姊曰吾家貧困未嘗有教者入門汝安知天下有三墳五典而誦無遺句邪逵曰抑昔姊抱聽隣家讀書今萬不遺一乃剝庭中桑皮爲牒或題扇屏且誦且記葦年經文通徧於閭里每有觀者稱云振古無倫門徒來學不遠萬里或襁負子孫舍於門側皆口授經文贈獻者積粟盈倉或云賈逵非力耕所得誦經口倦世所謂舌耕也

絳吏民間將殺達皆乘城呼曰負要殺我賢君寧俱死耳左右義達多爲請達得免

集古錄賈逵碑跋云裴注引魏略與志不同而此碑但云爲援所執臨以白刃不屈而死不載絳人約援事如傳所載不獨達有德於絳人而絳人臨危能與達生死亦可謂賢矣自古碑碣稱述功德常患過實如達與絳人德義碑不應略而不著頗疑陳素作傳好奇而所得非實也松之又注魏書達年五十五而碑云五十有四亦當以碑爲正

初達過皮氏

後漢書郡國志河東郡皮氏

達恐其先得皮氏乃以他計疑援謀人祝與

姜云祝奧豈卽祝公道邪

時縣寄治螽城

方輿紀要卷四十八螽城在河南澠池縣西四十里

遼疑屯田都尉藏亡民

傳作都尉而注引魏略作校尉微有不同

注太祖怒收遼等當送獄取造意者

御覽卷四百五十三取上有教字

注不卽著械謂獄吏目

御覽謂上有遼字卷六百四十四又引作遼曰

太祖征劉備先遣遼至斜谷觀形勢道逢水衡載囚人數十車

宋書百官志漢世水衡都尉主上林苑魏世主天下水軍舟

船器械

通鄧汝造新陂又斷山潘長谿水造小弋陽陂又通運渠二百餘里所謂賈侯渠者也

方輿紀要卷五十小弋陽陂在河南光州東新陂在汝寧府東水經渠水注沙水與廣漕渠合上承龐官陂云鄧艾所開也雖水流廢興瀆溝尚夥昔賈逵通運渠二百餘里謂賈侯渠而川渠逕復交錯畛陌無以辨之

黃初中與諸將並征吳破呂範於洞浦進封陽里亭侯

水經瓠子水注都關縣故城有羊里亭瓠河逕其南爲羊里水賈逵封羊里亭侯卽斯亭也方輿紀要卷四十七故陽里在陳州北

乃移屯潦口

方輿紀要卷五十一潦河在南陽府鎮平縣東四十里源出南陽縣之馬峙坪南流至新野縣界入於清河

太和二年帝使遠督前將軍滿寵東莞太守胡質等四軍從西陽直向東關

方輿紀要卷二十六西陽戍在安慶府桐城縣東北及夾石之敗微遠休軍幾無救

救下一本有也字

注時人亦以此多遠

何云宋本亦字作益

注青龍中帝東征乘輦入達祠

水經潁水注谷水逕小城北又東逕賈逵祠北廟在小城東
廟前有碑碑石生金于寶曰黃金可採爲晉中興之瑞寔字
記卷十賈逵碑在陳州項城縣東南二里梁國劉舉等立

注晉諸公贊曰充字公闔

晉書充傳逵晚始生充言後當有充闔之慶故以爲名字焉
注高貴鄉公之難司馬文王賴充以免爲晉室元功之臣位至
太宰封魯公諡曰武公

充傳博士秦秀議諡曰荒帝不納博士段暢希旨建議諡武
帝從之泰始中謠曰賈裴王亂紀綱王裴賈濟天下言亡魏
而成晉也

注及到梁淇

後漢書郡國志魏郡梁期卽梁淇也水經濁漳水注漳水又東逕武城南世謂之梁期城在鄴北俗亦謂之兩期城皆爲非也又郡國志鄴縣有武城卽期城矣

注逕歷太祖營前徑南過從南圍角西折當章門

方輿紀要卷四十九鄴城南面中曰中陽門亦曰章門

注孚出北門

方輿紀要卷四十九鄴北門亦曰元武門

注出守解長

後漢書郡國志河東郡解

注孚本姓馮復改爲李

復疑作後

注初平中爲公府令史以牒除爲新鄭長

後漢書郡國志河南郡新鄭

注及太祖輔政遷沛爲長社令

後漢書郡國志潁川郡長社

注沛辭去未到

到下一本有鄴字

注後占河南夕陽亭部荒田二頃

方輿紀要卷四十八夕陽亭在河南府東南

宿松羅忠濟初校

黟縣黃士陵覆校

陽湖吳翊寅再覆校

三國志注補卷十五

三國志注補卷十六

仁和趙一清撰

魏志列傳第十六

羽林監潁川棗祗建置屯田

後漢書百官志羽林左右監各一人六百石

太祖以峻爲典農中郎將數年中所在積粟

晉食貨志以任峻爲典農中郎將募百姓屯田許下得穀百萬斛郡國列置田官數年之中所在積粟方輿紀要卷四十七洧倉城在許州許昌故城東卽洧水之邸閣也棗祗募人屯田許下此其倉城也又臨潁縣北二十里有棗祗河或謂之棗村河縣西二十里有灌溝北接潁水南接泥河南北二

口俱有陡門亦曹魏時引水溉田處

注文士傳曰祇本姓棘先人避難易爲棗孫據字道彥

晉書棗據傳父叔禕魏鉅鹿太守

注嵩兄臄字元方襄陽太守

晉書作襄城

遷長水校尉

後漢書百官志長水校尉一人比二千石掌宿衛兵注引韋昭曰長水校尉典胡騎廐近長水故以爲名長水蓋關中小水也

注後與馮翊吉茂等隱於郡南太白山中

後漢書郡國志在扶風武功太一山古文以爲終南水經渭

水注太壹山亦曰太白山在武功縣南去長安二百里不知其高幾何俗云武功太白去天三百

侍中傅翼招則曰不謂卿也

一本招下有注云音若洽反

帝大怒踞牀拔刀

一本作胡牀

注臣松之案愉子紹字世嗣爲吳王師石崇妻紹之兄女也世說云紹是石崇姊夫

守鄭縣令

後漢書郡國志京兆尹鄭

於是遂拜畿爲河東太守固等使兵數千人絕陝津

陝津卽茅津亦謂之大陽津在陝州西北三里後漢書郡國志河東郡大陽有茅津是也

遂諺道從郎津度

郎音豆水經河水注門水北逕宏農縣故城東其水側城北流而注於河河水於此有洹津之名方輿紀要卷四十八郎津在河南靈寶縣西北十里

注魏略曰初畿與衛固少相侮狎

一本作狎侮

會白騎攻東垣高幹入獲澤

前漢書地理志河東郡垣獲澤後漢書郡國志垣有王屋山注史記曰魏武侯二年城王垣博物記曰山在東狀如垣據

此傳則漢末亦稱垣爲東垣矣何云龐德傳張白騎叛於宏
農白騎卽上張晟耶一清案張白騎見後漢書朱雋傳及志
張燕傳注

赴張辟拒守

張辟卽張城亦曰東張城

受詔作御樓船於陶河

通典州郡七河陽古孟津後亦曰富平津在其南謂之陶河
渚

追贈太僕諡曰戴侯子恕嗣

書斷云戴子恕孫預三世善草書時人以衛瓘方之

注明帝以恕大臣子擢拜散騎侍郎數月轉補黃門侍郎

御覽卷二百二十一三輔決錄曰恕拜黃門侍郎每直省開
威儀矜嚴

注次子安字仲悌

水經齊水注梁山之西南有呂仲悌墓

吏士之費與兼官無覺

覺字疑誤

若使善策必出於親貴固不犯四難以求忠愛

何云宋本固字上重親貴二字

恕以爲用不盡其人雖才且無益

何云才且二字宋本作文具

殛餘而放四凶

以鯀不在四凶之內與先儒說異

然亦怪陛下不知其本而憂其末也

何云宋本知作治

注通子順封龍陽亭侯晉初受禪以不達天命守節不移削爵
主徒武威

主字乃士之譌晉書宗室傳順字子思初封習陽亭侯及武帝受禪歎曰事乖唐虞而假爲禪名遂悲泣由是廢黜徙武威姑臧縣雖受罪流放守意不移而卒

注魏略曰恕在宏農寬和有惠愛及遷以孟康代恕爲宏農康字公休安平人

通典州郡七景初元年河南尹盧延上言成皋函谷二里六

十步宜御函谷關於峭下宏農太守杜恕議以東徙潼關著
郡下省函谷關徙蒯關廬氏縣下正始元年宏農太守孟康
上言移函谷關更號大峭關又爲金關顧氏祖禹謂此以關
城旣移欲更定新關之名耳一清案潼關旣建函谷遂廢蓋
於此時也孟康卽注漢書者師古漢書敘例曰安平廣宗人
隋書經籍志孟康漢書音九卷晉書王濟傳有太子洗馬孟
康別是一人

徵入爲中書令後轉爲監

漢書叙例云封廣陵亭侯

注杜氏新書曰恕遂去京師營宜陽一泉塢因其壘漸之固小
大家焉

水經洛水注洛水又東逕一合塢南城在川北原上高二丈南北東三箱天險峭絕唯築西面卽爲合固一合之名起於是矣方輿紀要卷四十八福昌城今河南宜陽縣治杜佑曰卽故乙合塢晉永嘉末魏浚屯洛北石梁塢族子該聚眾屯一泉塢蓋其地險固可憑也

恕在朝廷以不得當世之和故屢在外任

晉書杜預傳父恕與宣帝不相能遂以幽死承祚所謂不得當世之和者此也然則務伯固魏室之純臣而非道以終元凱仕晉爲之盡力平吳功則高矣其如有愧於王偉元何免爲庶人

晉書劉毅傳毅僑居平陽太守杜恕請爲功曹沙汰郡吏百

餘人三魏俾焉爲之語曰但聞劉功曹不聞杜府君據此恕
曾爲平陽太守而傳略之

徙章武郡

晉志總敘魏武置章武郡蓋分日渤海置治東平舒縣今北
直大城縣也

初恕從趙郡還陳畱阮武亦從清河太守徵俱自薄廷尉
薄當作簿謂對簿也

今向閑暇可試潛思成一家言在章武遂著體論八篇

隋經籍志杜氏體論四卷又篤論四卷杜恕謨

注四年卒於徙所

通典州郡七河南福昌縣北有魏杜畿杜恕墓

注魏略曰樂詳字文載少好學建安初詳聞公車司馬令南郡謝該善左氏傳乃從南陽步詣該問疑難諸要

後漢書儒林傳謝該字文儀南陽章陵人善明春秋左氏爲世名儒門徒數千百人建安中河東人樂詳條左氏疑滯數十事以問該皆爲通解之名爲謝氏釋行於世仕爲公車司馬令以父母老託疾去官歸鄉里會荊州道斷不得去少府孔融上書薦之詔卽徵還拜議郎以壽終注引魏略云從南陽步涉詣許從該問難諸要疑此有脫字

子寬字務叔

韓文公昌黎集河南尹杜君墓誌銘杜氏自戴侯畿始分戴侯之子恕爲隋州刺史令居京兆諸杜其後也其季寬孝廉

郎中

注倉邑八千戶

晉書預傳諡曰成

注杜氏新書曰武字文業闔達博通淵雅之士位止清河太守
隋經籍志阮子正論五卷阮武撰

注秦乃詭辭而對曰非以無益

後漢書鄭太傳作非謂無用

注而明公權以爲爪牙

後漢書作攤之以爲爪牙

注自三原狹口以來

狹口當作硤口卽望垣硤見後漢書黃卓傳

注又與王允謀共誅卓

何云後漢書作與何顯荀攸共謀殺卓爲得其實

復遷下蔡長邵陵令

後漢書郡國志九江郡下蔡故屬沛汝南郡召陵

渾曰興等破散竄在山陽

陽一本作阻

興等懼將餘眾散鄜城

方輿紀要卷五十七鄜城廢縣在鄜州洛川縣東南七十里

漢屬左馮翊後漢省

又賊靳富等脅將夏陽長邵陵令

何云少章曰渾爲左馮翊邵陽乃其屬縣此因前有邵陵令

之文而誤邵陵屬汝南郡在豫州刺史部內去左馮翊地界遠矣

郡界下涇患水滯

御覽卷二百六十一患上有常字

終有魚稻經久之利

御覽有字作成

民賴其利刻石頌之號曰鄭坡

方輿紀要卷二十九鄭坡在徐州蕭縣西北

遷將作大匠

漢百官公卿表將作少府奏官景帝更名將作大匠

注泰始七年以袁爲司空固辭不受終於家

晉書鄭袤傳袤封密陵侯疾病失明屢乞骸骨不許泰始中以袤爲司空遣五官中郎將國坦就第拜授袤前後辭讓遣息偁上送印綬至於十數謂坦曰魏以徐景山爲司空吾時爲侍中受詔譬旨徐公語吾曰三公當上應天心苟非其人實傷和氣不敢以垂死之年累辱朝廷也終於不就遵大雅君子之迹可不務乎固辭久之見許以侯就第拜儀同三司薨年八十五諡曰元

注子默字思元晉諸公贊曰默遵守家業以篤素稱位至太常晉書鄭默傳默起家祕書郎封關內侯拜大司農轉光祿勳卒諡曰成隋書經籍志董卓之亂獻帝西遷圖書緘帛軍人皆取爲帷囊所收而西猶七十餘載西京大亂掃地皆盡魏

代漢采掇遺亡藏在祕書中外三閣魏祕書郎鄭默始制中經又晉書烈女傳妻曹氏魯國辭人妻先娶孫氏早亡聘之爲繼室妻爲司空其子深等又顯朝列時人稱其榮貴曹氏默懼盛滿每默等升進輒憂形於色所獲秩祿必班散姻親務令周給家無餘資一清案宋書鄭鮮之傳高祖渾魏將作大匠曾祖襲大司農南史同豈默有二名邪

黃初末爲長安令

後漢書郡國志京兆尹長安

慈躬往省閱料簡輕重

御覽卷二百六十一料簡作斟酌

自非殊死但鞭杖遣之

御覽作便杖而遣之

胡常怨望慈皆勞之欲詣洛者爲封過所

後漢書光武紀煩擾道上疲費過所古今注凡傳皆以木爲之長五寸書符信於上又以一板封之皆封以御史印章所以爲信也如今之過所也過所若今之路文引

注又課民無牛者令畜猪狗賣以買牛

晉食貨志狗作投誤

注會太祖破鄴

破上何氏校增攻字

注案孔氏譜孔父字元儒孔子之後曾祖疇字元矩陳相漢桓帝立老子廟於苦縣之賴鄉畫孔子像於壁疇爲陳相立孔子

碑於像前今見存

水經陰溝水注過水北逕老子廟東廟前有二碑在南門外
漢桓帝遣宦官管霸祠老子命陳相邊韶撰碑北有雙石闕
闕北東側有孔子廟廟前有一碑西面是陳相魯國孔疇建
和三年立北則老君廟廟東院中有孔井焉

宿松羅忠濟初校

黟縣黃士陵覆校

陽湖吳翊寅再覆校

三國志注補卷十七

仁和趙一清譔

魏志列傳第十七

漢末并州刺史丁原以遼武力過人名爲從事使將兵詣京都
宋百官志荊州有從事史在議曹從事史下大較應是魏晉
以來置據此傳則他州亦有之不獨荊州也

遼遂單身上公山入孫家拜妻子孫歡喜隨詣太祖

方輿紀要卷三十三沂州郯城縣有三山或以爲卽馬陵山
也在縣東十五里

陳蘭梅成以氏六縣叛

方輿紀要卷二十六廬州舒城縣東南六十里有六城此云

氏六縣未詳豈六縣有氏種乎

濤中有天柱山

前漢書地理志廬江郡濤天柱山在南後漢書郡國志濤作潛今霍山縣也

遼左右麾圍直前急擊圍開遼將麾下數十人得出餘眾號呼曰將軍棄我乎遼復還突圍拔出餘眾權人馬皆披靡無敢當者

御覽卷二百七十九引魏略曰張遼爲孫權所圍遼潰圍出復入權眾破走由是威震江東兒啼不肯止其父母以遼恐之方輿紀要卷二十六藏舟浦在廬州府城西北隅張遼禦孫權鑿此以藏戰艦處

注或顧率然之形

率然常山蛇名蓋陣勢似之擊首則尾應擊中則首尾皆應也

遼還屯雍邱得疾帝遣侍中劉睦將太醫視疾

宋禮志漢三公病遣中黃門問疾魏晉則黃門郎尤重者或侍中也遼位未至公而遣侍中益寵之也

疾小差還屯孫權復叛

權無再服再叛之事前後疊出史家牘詞陳承祚刊落不盡耳

遼病遂篤薨於江都

江都後屬吳疆場之間一彼一此無常也

樂進字文謙陽平衛國人也

後漢書郡國志東郡衛公國是以衛縣爲公國以封周後此
國字亦史家牘詞

從擊袁紹於官渡力戰斬紹將淳於瓊

何云俘之未斬也

建安十一年

何云宋本作十二年

每臨戰功

功一本作攻

遣進李典擊之

何云進下宋本有與字

後從平荊州畱屯襄陽

宋書州郡志襄陽公相魏武平荊州分南郡編以北及南陽之山都立屬荊州魚豢曰魏文帝立一清案曹叡云先帝南守襄陽則魚氏以郡是不立爲有據

又討劉備臨沮長社普

後漢書郡國志南郡臨沮社一本作杜

旌陽長梁大皆大破之

宋州郡志南郡太守宋初領縣九後州陵監利度屬巴陵旌陽文帝元嘉十八年省併枝江二漢無旌陽見晉太康地志疑是吳所立一清案沈約此言蓋偶未省此傳也

使將兵詣徐州攻廣威拔之

後漢書郡國志彭城國廣戚故屬沛此戚字是戚之誤

又別將破高雍於須昌

後漢書郡國志東平國須昌故屬東郡

從攻壽張定陶離狐

後漢書郡國志濟陰郡離狐故屬東郡

從征黃巾劉辟黃邵等屯版梁邵等夜襲太祖營禁帥麾下擊破之斬辟邵等盡降其眾

此傳之誤與武紀同曹公破辟邵在建安元年而五年又云汝南降賊劉辟叛則此時邵死而辟降可知不得并斬也乃選步騎二千人使禁將守延津以拒紹

寰宇記卷五十六左傳廩延注云汲郡城南有延津城于禁

守延津以拒袁紹卽此城也方輿紀要卷四十九延津城在
衛輝府南戰國策謂之境津孔穎達曰卽延津也城葢後漢
末所築南臨津爲戍守處

從延津西南緣河至汲獲嘉二縣

後漢書郡國志河內郡汲獲嘉

太祖復使禁別將屯原武

後漢書郡國志河南郡原武

秋大霖雨漢水溢平地水數丈禁等七軍皆沒禁與諸將登高
望水無所回避羽乘大船就攻禁等禁遂降

趙儼傳太祖征荊州以儼領章陵太守徙都督護軍護于禁
張遼張郃朱靈李典路招馮楷七軍葢以襄陽重鎮故特置

重兵以守之其後邊等徙屯而兵俱屬於禁觀其奪朱靈營以靈爲部下督可知蜀志關羽傳云禁所督七軍皆沒卽此七軍益審見矣又晉書宣帝紀帝言荊州刺史胡脩麤暴南鄉太守傅方驕奢並不可居邊魏武不之察及蜀將關羽爲圍曹仁於樊于禁等七軍皆沒脩方果降羽而仁圍甚急焉爲安遠將軍

御覽卷六百八十五魏文帝與于禁詔曰昔漢高脫衣以衣韓信光武解綬以帶李忠誠皆人主當時貴敬功勞今以遠游冠與將軍

注至如此傳爲紹軍先潰懼郭圖之譖然後歸太祖爲參錯不同矣

姜云此必邵家傳自文其醜故與武紀紹傳互異

注後討桶城與張遼俱爲軍鋒

後字何氏校改從

注劉備屯陽平郤屯廣石

方輿紀要卷五十六廣石戍在陝西寧羌州沔縣西與陽平關相近

注其後備於走馬谷燒都圍

走馬谷亦謂馬鳴閣方輿紀要卷六十八謂在四川漢中府昭化縣北百里亦見徐晃傳

追至祁口交戰破之

祁口卽沔口方輿紀要卷七十九沔水在襄陽宜城縣西水

經沔水下注沔水上通梁州沔陽縣東逕新城之沔谿東流合於夷水謂之沔口一清案沔音怡宋書州郡志新城太守領祁陽令魏立晉太康地志作沔音祁則魏晉之間固有作祁字者矣

乃還屯方城

方輿紀要卷五十一方城山在河南裕州東北四十里左傳楚方城爲城是也或曰楚置城於山上以爲要隘其山連接南陽唐縣葉縣之境幾數百里亦曰長城山

帝驛馬召郤到京都帝自幸河南城

後漢書郡國志河南周公時所城雒邑也春秋時謂之王城方輿紀要卷四十八城在河南府西北亦曰郟邑晉地道記

河南城去雒城四十里

郤雖武將而愛樂儒士嘗薦同鄉里湛經明行脩

何氏校甲作畢

諸葛亮復出祁山詔郤督諸將西至略陽亮還保祁山郤追至木門與亮軍交戰飛矢中郤右膝薨

御覽卷一百九十一引漢末傳曰丞相亮出軍圍祁山以木牛運糧魏司馬宣王張郤救祁山夏六月亮糧盡軍還至於青封木門郤追之亮駐軍削大樹皮題曰張郤死此樹下豫令兵夾道以數千强弩備之郤果自見千弩俱發射郤而死方輿紀要卷五十九木門谷在秦州西南九十里

太祖授晃兵使擊卷

後漢書郡國志河南郡卷

又與史演擊袁紹運車於故市功最多封都亭侯

姜云前封都亭侯此又封殆以前封非出操耶

從征荊州別屯樊討中廬臨沮宜成賊

後漢書郡國志三縣並屬南郡

賊屯偃城

方輿紀要卷七十九偃城在襄陽府城北五里

太祖案行諸營士卒咸離陣觀而是軍營整齊將士駐陣不動
太祖歎曰徐將軍可謂有周亞夫之風矣

御覽卷七百五十七引魏略曰徐晃性嚴驅使將士不得閒
息於是軍中爲之語曰不得餉屬徐晃晃聞此語笑曰我槌

破汝錫鎬耶

靈後遂爲奸將名亞晃等至後將軍封高唐亭侯

何云少章云亭字衍案注引魏書靈以鄒侯更封高唐乃縣侯也

宿松羅忠濟初校

黟縣黃士陵覆校

陽湖吳翊寅再覆校

三國志注補卷十八

仁和趙一清誤

魏志列傳第十八

遷離狐太守

後漢書郡國志濟陰郡離狐故屬東郡一清案離狐城在單縣西據此傳則魏時離狐又嘗置郡矣

羣竹承於長廣

後漢書郡國志東萊郡長廣故屬瑯琊

太祖嘉之遷破虜將軍

水經河水注函谷關號天嶮郭緣生記曰魏武征韓遂馬超連兵此地道東原上有李典營一清案傳不云典從征蓋略

之

吾不可以私憾而忘公議乎

姜云不字衍

分汝南二縣以通爲陽安都尉

後漢書郡國志汝南郡陽安道亭故國則陵侯國注引魏氏
春秋曰初平三年分二縣置陽安都尉方輿紀要卷五十曹
操分汝南置陽安都尉以朗陵縣屬焉亦曰陽安郡尋罷陽
安城在光州息縣西南十里朗陵城在確山縣西南三十五
里

注王隱晉書曰緒子秉字元胄有雋才爲時人所貴官至秦州
刺史

世說卷一注引李康家誠卷十四注引文章志曰李厥祖康
秦州刺史父重平陽太守厥好學善隸草與兄式齊名此名
秉或元胄有二名方輿紀要卷五十九魏增置秦州治上邽
今鞏昌府秦州西六十里有故城領郡六隴西漢陽武都皆
故郡也南安中平五年置廣魏卽初平四年所置永陽郡陰
平本漢廣漢屬國魏武改置陰平郡太和三年武都陰平皆
入於蜀

霸年十八將客數十人徑於費西山中要奪之

西山卽蒙山也在費縣西北五十里

沛國公武周爲下邳令

少章云公字衍武周沛國竹邑人詳胡質傳注

三國志卷之十一
二
霸與戰於逢龍

寰宇記卷百二十五逢龍城在皖水之北遂號爲皖城

權遣數萬人乘船屯舒口

方輿紀要卷二十六舒城今廬州府舒城縣治漢爲廬江郡
治三國時廢爲境上地舒口卽巢湖口也

霸從討孫權於濡須口與張遼爲前鋒行遇霖雨大軍先及水
遂長賊船稍進將士皆不安

御覽卷 引及作反進作近

太祖善之拜楊威將軍

拜下一本有霸字宋書百官志楊威將軍魏置

注與霸俱戰伐觀常爲先登征定青徐羣賊功次於霸封呂都

亭族

呂都前漢書地理志屬濟陰郡後漢省今以封孫觀蓋縣廢而城存耳

太祖先定荊州江夏與吳接民心不安乃以聘爲江夏太守吳魏並立江夏郡吳江夏郡治沙羨孫權以程普領太守魏以文聘爲太守屯石陽

與樂進討關羽於尋口

方輿紀要卷七十六潯水城在蘄州東潯陽記謂之蘭池城古潯陽也尋口潯水入江之口卽九江口也今江西九江府德化縣潯陽城蓋六朝時改置非漢魏之舊

使聘別屯沔口止石梵

方輿紀要卷七十六石陽城在黃州府黃陂縣西二十二里
亦名石梵與河口相近

呂虔字子恪任城人也

御覽卷十一引長沙耆舊時霖雨廢人業太守呂虔令戶曹
掾文度齋戒在社三日夜夢見白頭翁謂曰汝來何遲明果
大霽

襄陵校尉杜松

襄陵字誤當作襄賁後漢書郡國志東海郡襄賁縣賁音肥
是時昌豨作亂於東海故艮母得與稀通若河東之襄陵與
陳畱襄邑之亦名襄陵皆去東海甚遠陵字爲誤無疑

遷徐州刺史加威虜將軍請瑯琊王祥爲別駕民事一以委之

世多其能任賢

晉書王祥傳虔委以州事於時寇盜充斥祥率勵兵士頻討破之州界清靜政化大行時人歌之曰海沂之康實賴王祥邦國不空別駕之功初呂虔有佩刀工相之以爲必登三公可服此刀虔謂祥曰苟非其人刀或爲害卿有公輔之量故以相與祥固辭強之乃受

注孫盛雜語曰祥字休徵性至孝後母苛虐每欲危害祥

世說注引祥世家曰祥父蠡娶高平薛氏生祥繼室以廬江朱氏生覽

注祥脫衣將剖冰求之有少堅冰解

少字疑當作頃實字紀卷百二十五魚池在舒州望江縣西

南二十里

注晉武踐阼拜祥爲太保封睢陵公泰始四年年八十九薨

史通暗惑篇曰新晉書祥傳漢末遭亂扶母攜弟覽避地廬江隱居三十餘年不應州郡之命母終徐州刺史呂虔檄爲別駕年垂耳順覽勸之乃應召年八十五泰始五年薨難曰祥爲別駕是漢建安中徐州未清時耳有魏受命凡三十五年上去徐州寇賊充斥下至晉泰始五年當六十年已上矣祥於建安中年垂耳順更加六十六載至晉泰始五年則當年一百二十歲矣而史云年八十五薨者何也如必以終時實年八十五則爲徐州別駕止可二十五六年矣又云其未從官以前隱居三十餘載但其初被檄時止年二十五六自

此而往安得復有三十餘年乎必謂祚爲別駕在建安後則徐州清偃何得云於時寇賊充斥祚率勵兵士頻討破之乎求其前後無一符會也

褚身斬首級遷武衛中郎將

宋百官志武衛將軍無員初魏王始置武衛中郎將文帝踐阼改爲衛將軍王禁旅

明帝卽位進牟鄉侯

進下落封字

永故富春長

後漢書郡國志吳郡富春

徐出取車上刀戟步出

何云御覽卷

出作去

龐惠字令明南安狁道人也

後漢書郡國志漢陽郡獬道狁疑狁之譌與獬同

破白騎於兩殺間

方輿紀要卷四十八張白塢在河南宜陽縣西北後漢末張白騎據此曹公使龐惠破之

太祖破超於渭南

御覽卷八百九十七傳元乘輿馬賦曰馬超破蘇氏塢塢中有駿馬百餘匹自超以下俱爭取肥好者將軍龐惠獨取一騮馬形觀既醜眾笑之其後從馬超戰於渭南逸足電發追不可逮眾乃服

惠常曰我受國恩義在效死我欲身自擊羽今年我不殺羽羽當殺我後親與羽交戰射羽中額

何云龐德盡節曹氏誠爲俠烈但少依馬騰父子騰族於曹而惠爲曹用超與其兄俱在蜀而顧與蜀戰棄好卽仇未爲合宜

惠罵羽曰豎子何謂降也

何云西人負氣而不知義惜哉

龐涓字子冀

一本冀作異案御覽卷四百三十八引魏志作子異

酒泉表氏人也

後漢書郡國志酒泉郡表氏案前漢書地理志作表是古通

用

初以涼州從事守破羌長

前漢書地理志金城郡破羌宣帝神爵二年置

文帝踐阼拜駙馬都尉遷西海太守

前漢書地理志張掖郡居延居延澤在東北古文以爲流沙

後漢書郡國志居延屬國注曰建安末立爲西海郡

祿福長尹嘉

前漢書地理志曰祿福後漢書郡國志曰福祿屬酒泉郡或

漢末又改稱耳

注皇甫謐列女傳曰酒泉列女龐娥親者表氏龐子夏之妻祿

福趙君安之女也

姜云據士安作傳娥親是其名而志但云娥豈傳寫之譌或
娥是女子之通稱乎一清案傳云趙君安亦與陳志不同
注娥親謂左右曰卿等笑直以我女弱不能殺壽故也
一本笑下有我字

先是河右擾亂隔絕不通燉煌太守馬艾卒官府又無丞
後漢書百官志注引古今注曰建武十四年罷邊郡太守丞
長史領丞職

時酒泉黃華張掖張進各據其郡欲與恭艾并勢

何云冊府引無艾字

恭卽遣從弟華攻酒泉沙頭乾齊二縣

二縣屬酒泉郡

注孫賓碩者北海人也

後漢書趙岐傳賓碩名嵩

注郡功曹趙息呵廊下

趙岐傳息作襲注引決錄注襲字元嗣先是杜伯度崔子玉以工草書稱於前代襲與羅暉拙書見嗤於張伯英英頗自矜高與朱賜書曰上比崔杜不足下方羅趙有餘也

注時息從父岐

後漢書岐字邠卿京兆長陵人初名嘉生於御史臺因字臺卿後避難故自改名字示不忘本土也

注而賓碩亦從此顯名於東國仕至豫州刺史

岐傳及水經注並作青州刺史

注岐爲劉表陳其本末由是益禮賓碩頃之賓碩病亡

水經卷二十六汶水注東北逕漢青州刺史孫嵩墓西又東逕安邱縣故城北城對平山山之西南有孫賓碩兄弟墓碑誌並在寔字記卷二十四孫嵩墓在密州安邱縣南四十里注豐遂單騎入南羌中合眾得千餘騎從樂浪南山中

浪字乃涖字之誤

注乃攘臂結袵獨邊之

邊一本作追是也

三國志注補卷十八

宿松羅忠濟初校

黟縣黃士陵覆校

陽湖吳翊寅再覆校